

NACRT

Na osnovu člana 37. stav 1. tačka f) Ustava Zeničko-dobojskog kantona i člana 75. Zakona o sportu u Bosni i Hercegovini ("Službeni glasnik Bosne i Hercegovine", broj: 27/08 i 102/09), Skupština Zeničko-dobojskog kantona na sjednici održanoj _ _ 2010.godine, donosi:

ZAKON O IZMJENAMA I DOPUNAMA ZAKONA O SPORTU

Član 1.

U Zakonu o sportu („Službene novine Zeničko-dobojskog kantona“, broj:11/02 01/04) član 1. mijenja se i glasi:

„Član 1.

Ovim Zakonom uređuje se sport na području Zeničko-dobojskog kantona, javni interes, ciljevi i nadležnosti Kantona i općina, osnovni principi u organizovanju sporta, prava i obaveze sportista, domaća i međunarodna sportska takmičenja, sportske priredbe, izgradnja, održavanje i korištenje sportskih objekta, organiziranje i rad ustanova u području sporta, sportske aktivnosti osoba s invaliditetom, zdravstvena zaštita sportista, sprečavanje i suzbijanje svih oblika nasilja i nedoličnog ponašanja gledalaca i korištenja nedozvoljenih stimulativnih sredstava u sportu, stručni rad, naučnoistraživački rad i informatika u sportu, finansiranje sportskih aktivnosti, nadzor i kaznene odredbe.“

Član 2.

Iza člana 2. dodaju se novi članovi „2a.“ i „2b.“ koji glase:

„Član 2a.

Svi građani (djeca, omladina, odrasli i osobe sa invaliditetom) imaju pravo da provode sportske aktivnosti na bazi interesa i dobrovoljnosti u skladu sa odredbama ovog zakona i međunarodnim konvencijama: Evropskom konvencijom o zaštiti ljudskih prava i osnovnih sloboda, Evropskom poveljom o sportu, Konvencijom UN-a o pravima djeteta, Međunarodnom konvencijom protiv dopinga u sportu, Konvencijom o pravima osoba sa invaliditetom, Konvencijom o pravima osoba sa invaliditetom namjenjenoj djeci, Evropskom konvencijom o nasilju i nedoličnom ponašanju gledalaca na sportskim priredbama, Olimpijskom poveljom, Paraolimpijskom poveljom, Evropskim kodeksom o sportskoj etici, Deklaracijom o sportu, toleranciji, fer-pleju, pravilima međunarodnih sportskih asocijacija, te Izjavom iz Lozane o organizovanju sporta u Bosni i Hercegovini, kao i konvencijama i drugim

međunarodnim multilateralnim i bilateralnim ugovorima kojima pristupi ili koje prihvati Bosna i Hercegovina nakon stupanja na snagu ovog zakona.

Član 2b.

Osnovni principi na kojima se organizira sport na području Zeničko-dobojskog kantona su:

- prava i slobode sportista,
- afirmacija duha olimpizma,
- pravo svih građana da se bave sportom pod jednakim uvjetima bez obzira na nacionalnu, vjersku, političku, rasnu, socijalnu i spolnu pripadnost,
- ostvarivanje javnog interesa Kantona u ovoj oblasti i obaveza kantonalnih organa da zakonima i na drugi način, materijalnom podrškom i programima razvoja stvaraju opće i posebne uvjete za sportske aktivnosti, sportsko napredovanje i usavršavanje, materijalnu i društvenu stimulaciju za ostvarivanje vrhunskih sportskih rezultata,
- organiziranje efikasnog sistema stručnog osposobljavanja i usavršavanja stručnih kadrova u sportu,
- osiguravanje zdravstvene zaštite sportista i sprečavanje upotrebe nedozvoljenih stimulativnih sredstava,
- stručnost u radu i podsticanje naučnoistraživačkog rada, primjenu savremenih metoda rada, informatike i izdavačke djelatnosti,
- pravilo da se svi sporovi između sportista, sportskih organizacija i organa rješavaju isključivo preko i unutar odgovarajućih sportskih organa i arbitražnih sportskih tijela,
- autonomnost sportskih organizacija u pogledu uređivanja unutrašnjih odnosa i udruživanja.“

Član 3.

U članu 3. ispred postojećeg stava dodaje se novi stav 1. koji glasi:

„Sport je djelatnost od javnog interesa u Kantonu i općinama.“

Dosadašnji stav 1. postaje stav 2.

Član 4

Član 5. mijenja se i glasi:

„Član 5.

Stručni poslovi u sportu u smislu ovog Zakona su:

- planiranje i realizovanje sportskih aktivnosti djece i omladine,
- planiranje i realizovanje sportske obuke,
- planiranje i treniranje sportista,
- obučavanje građana u sportskim znanjima i vještinama,
- planiranje i realizovanje sportske rekreacije građana,
- dijagnosticiranje i provjera psihofizičkih i motoričkih sposobnosti učesnika,
- planiranje i izvođenje korektivne gimnastike,
- provođenje pravila u sportu,
- informatika u sportu,

- menadžment i marketing u sportu,
- naučnoistraživačke djelatnosti."

Član 5.

Član 6. mijenja se i glasi:

“Član 6.

Stručne poslove u oblasti sporta mogu obavljati isključivo stručna lica osposobljena za rad u sportu.

Stručna lica moraju ispunjavati sljedeće uvjete:

- imati visoku ili višu stručnu školsku spremu iz oblasti sporta i fizičkog vaspitanja, ili
- imati visoku ili višu školsku spremu iz drugih oblasti i licencu za rad u oblasti sporta, ili
- imati status vrhunskog sportiste s diplomom za rad u oblasti sporta.

Školovanje kadrova za rad u sportu i tjelesnom odgoju, te izdavanje diploma za rad u sportu obavljaju visokoškolske ustanove.

Stručno usavršavanje i osposobljavanje u sportu obavljaju visokoškolske ustanove registrirane za poslove stručnog usavršavanja i osposobljavanja.”

Član 6.

Iza člana 9. dodaju se novi članovi “9a.” i “9b.” koji glase:

“Član 9a.

Amaterski sportski klub je dobrovoljna, nevladina, neprofitna organizacija koja se organizuje kao udruženje za obavljanje sportske djelatnosti u skladu sa Zakonom o udruženjima i fondacijama Bosne i Hercegovine (“Službeni glasnik BiH”, broj: 32/01 i 42/03), Zakonom o udruženjima i fondacijama Federacije Bosne i Hercegovine (“Službene novine FBiH” broj: 45/02), Zakonom o sportu u Bosni i Hercegovini (“Službeni glasnik Bosne i Hercegovine”, broj: 27/08 i 102/09), ovim zakonom i drugim važećim zakonima i propisima kojim se uređuje rad udruženja u sportu.

Amaterski sportski klub mogu osnovati najmanje tri fizička lica ili pravno lice.

Amaterski sportski klub mogu osnovati domaća pravna i fizička lica

Član 9b.

Profesionalni sportski klub osniva se kao privredno društvo s ciljem obavljanja sportske djelatnosti.

Profesionalni sportski klub osniva se i registruje kao poslovni subjekat kod nadležnog suda u skladu sa Okvirnim zakonom o registraciji poslovnih subjekata u

Bosni i Hercegovini ("Službeni glasnik BiH" broj 42/04) i Zakonom o registraciji poslovnih subjekata u Federaciji Bosne i Hercegovine ("Službene novine Federacije BiH" broj: 27/05, 68/05, i 43/09), Zakonom o sportu u Bosni i Hercegovini, ovim zakonom, kao i statutima sportskih saveza."

Član 7.

Članovi 11.,12.i 13., brišu se.

Član 8.

Iza člana 14. dodaju se novi članovi "14 a." i "14 b." koji glase:

"Član 14 a.

Pored upisa u sudski, odnosno registar udruženja u Ministarstvu pravosuđa i uprave Zeničko-dobojskog kantona, fizičko lice i pravno lice u oblasti sporta se upisuje u Registar fizičkih i pravnih lica u oblasti sporta (u daljem tekstu Registar) koji vodi Sportski savez Zeničko-dobojskog kantona.

Bliži propis o vođenju Registra pravnih i fizičkih lica u oblasti sporta na nivou Kantona donosi Ministarstvo za obrazovanje, nauku, kulturu i sport Zeničko-dobojskog kantona (u daljem tekstu: Ministarstvo).

Član 14 b.

S ciljem sistematskog praćenja i evidentiranja stanja u sportu, stručne, naučne i izdavačke djelatnosti, organizira se jedinstveni informacioni sistem u sportu.

Sadržaj i oblik informacionog sistema usklađuje se sa aktima sektora za sport Ministarstva civilnih poslova Bosne i Hercegovine, i standardima evropske sportske informacione mreže.

Informacioni sistem Kantona sastavni je dio informacionog sistema BiH.

Sva pravna i fizička lica registrirana za obavljanje sportskih aktivnosti obavezna su voditi evidenciju u skladu s jedinstvenim informacionim sistemom u sportu.

Informacioni sistem u sportu na području Kantona vodi Sportski savez kantona u saradnji sa sportskim savezima sportskih disciplina, a u skladu sa sadržajem i oblikom informacionog sistema iz stava 2. ovog člana."

Član 9.

U članu 15. stav 1. riječ "ili" zamjenjuje se riječju "i".

Član 10.

Član 16. se briše.

“

Član 11.

Član 17. mijenja se i glasi:

“Član 17.

Sportska takmičenja između škola na nivou općina pripremaju, organizuju i provode općinska udruženja pedagoga fizičke kulture odnosno sportski savezi općina u kojima nije formirano udruženje pedagoga fizičke kulture.

Sportska takmičenja između škola na nivou Kantona i šire organizuje Kantonalno udruženje pedagoga fizičke kulture u saradnji sa Kantonalnim sportskim savezom i sportskim savezima općina. Na programske sadržaje i kalendar školskih sportskih takmičenja na nivou općina i kantona saglasnost daje Ministarstvo na osnovu mišljenja Pedagoškog zavoda.

Član 12.

Iza člana 20., dodaju se novi članovi “20 a.” i “20 b.” koji glase:

"Član 20 a.

Sportista je obavezan da se pridržava opštih i posebnih pravila koja su propisana ovim Zakonom, Zakonom o sportu u Bosni i Hercegovini, drugim zakonima, podzakonskim propisima i pravilima međunarodnih sportskih asocijacija i strukovnih sportskih organizacija koji vrijede za određeni sport, a naročito:

- poštuje norme i pravila sportskog ponašanja,
- redovno trenira i učestvuje na takmičenjima,
- poštuje sportska pravila, službena lica i gledaoce,
- svojim ponašanjem čuva ugled sportskog kolektiva i sredine koju predstavlja,
- saraduje sa zdravstvenim službama i posebnim organima koji provjeravaju upotrebu nedozvoljenih stimulativnih sredstava.

Član 20 b.

Sportista ima pravo da:

- bude zaštićen od svake vrste duhovnog i fizičkog nasilja, ugrožavanja slobode, ljudskog i sportskog integriteta, zdravlja i sportskog dostojanstva,
- koristi sportske objekte i opremu, usluge stručnog rada i zdravstvene zaštite u skladu sa propisima,
- na osnovu slobodno izražene volje učestvuje u reprezentativnim selekcijama,
- na osnovu slobodno izražene volje se udružuje u sportski sindikat."

Član 13.

Član 22. mijenja se i glasi:

“Član 22.

Sportista stiče status vrhunskog sportiste Bosne i Hercegovine u skladu s članom 41. Zakona o sportu u Bosni i Hercegovini.

Bliži kriteriji za sticanje statusa vrhunskog sportiste kao i oblici i načini ostvarivanja prava koja sportisti ostvaraju na osnovu kategorizacije sportista na nivou Bosne i Hercegovine propisani su Pravilnikom o kategorizaciji sportista na nivou Bosne i Hercegovine. (“Službeni glasnik BiH” broj: 02/09)”

Član 14.

Član 23., briše se.

Član 15.

Iza člana 24. dodaje se novi član “24.a” koji glasi:

“Član 24 a.

U sportskim takmičenjima na području Zeničko-dobojskog kantona mogu učestvovati i strani državljani.

Prava i obaveze sportista stranih državljana regulišu se ugovorom sa sportskim organizacijama u skladu sa međunarodnim sportskim pravilima.

Sportisti i sportski stručnjaci strani državljani moraju imati dozvolu za rad od nadležnog državnog organa i registrovati se u skladu sa članom 42. Zakona o sportu u Bosni i Hercegovini kod Federalnog ministarstva kulture i sporta.”

Član 16.

U članu 28., ispred stava 1. dodaje se novi stav koji glasi:

“Sportistima i svim učesnicima u sportu zabranjeno je da uzimaju nedozvoljena stimulaturna sredstva, da ih daju kao i da podstiču njihovo korištenje u skladu sa pravilima Svjetske antidoping agencije (“WADA”).”

Dosadašnji stavovi 1. i 2. postaju stavovi 2. i 3.

Član 17.

U članu 29., iza stava 2., dodaju se stavovi 3., 4. i 5. koji glase:

“Sportski savezi određene sportske grane, mogu se osnovati ako na njihovu području djelovanja postoje najmanje tri sportska kluba odnosno sportska društva iz tog sporta.

Sportski savezi Kantona u određenom sportu mogu se udruživati u sportske saveze određenog sporta na nivou Federacije Bosne i Hercegovine, odnosno u sportske saveze određenog sporta na nivou Bosne i Hercegovine.

Za jedan sport na nivou Zeničko-dobojskog kantona može se osnovati samo jedan sportski savez."

Član 18.

Iza člana 33. dodaju se novi članovi "33a.", "33b.", "33 c.", "33d.", "33 e".i "33 f." koji glase:

"Član 33 a.

Radi organizovanja sportsko-rekreativne aktivnosti i sportskih takmičenja osoba sa invaliditetom, osnivaju se sportski klubovi osoba sa invaliditetom.

Sportski klub osoba sa invaliditetom može obavljati sportsku aktivnost amaterski ili profesionalno.

Sportski klubovi iz stava 1. ovog člana mogu se udruživati u sportske saveze Zeničko-dobojskog kantona, Federacije Bosne i Hercegovine i Bosne i Hercegovine, a mogu se udruživati i u sportska društva osoba sa invaliditetom.

Sportski savezi osoba sa invaliditetom usklađuju i koordiniraju aktivnosti klubova, organizuju takmičenja i uređuju sva ostala pitanja koja se odnose na sport osoba sa invaliditetom u određenom sportu.

Sportski savezi osoba sa invaliditetom registruju se kao udruženja.

Član 33 b.

Amaterski sportski klub osoba sa invaliditetom je dobrovoljna nevladina neprofitna organizacija koja se organizuje kao udruženje građana za obavljanje sportske djelatnosti u skladu sa Zakonom o udruženjima i fondacijama Bosne i Hercegovine ("Službeni glasnik BiH", broj: 32/01 i 42/03), Zakonom o udruženjima i fondacijama Federacije Bosne i Hercegovine ("Službene novine FBiH" broj: 45/02), Zakonom o sportu u Bosni i Hercegovini, ovim zakonom i drugim propisima iz oblasti sporta.

Član 33 c.

Profesionalni sportski klub osoba sa invaliditetom osniva se kao privredno društvo, odnosno preduzeće s ciljem obavljanja sportske djelatnosti.

Profesionalni sportski klub osoba sa invaliditetom osniva se i registruje kao poslovni subjekat u skladu sa Okvirnim zakonom o registraciji poslovnih subjekata u Bosni i Hercegovini ("Službeni glasnik BiH" broj: 42/04), Zakonom o privrednim društvima u Federaciji Bosne i Hercegovine ("Službene novine Federacije BiH" broj: 23/99, 45/00, 02/02, 06/02, 29/03, 68/05, 91/07, 84/08, 88/08) kojim se uređuje osnivanje poslovnih subjekata, Zakonom o sportu u Bosni i Hercegovini, ovim zakonom, kao i statutima sportskih saveza.

Član 33 d.

Sportski klubovi osoba sa invaliditetom mogu se udruživati u sportska društva osoba sa invaliditetom radi uređivanja i ostvarivanja zajedničkih ciljeva i interesa, kao i zajedničkog nastupanja u oblasti sporta.

Sportski klubovi osoba sa invaliditetom udruženi u sportsko društvo osoba sa invaliditetom regulišu međusobne odnose i prava osnivačkim aktom i drugim aktima sportskog društva osoba sa invaliditetom.

Sportsko društvo osoba sa invaliditetom je nosilac prava na zajednički naziv i zajedničke simbole, ako osnivačkim i drugim aktima nije drugačije određeno.

Na osnivanje, upis u registar, obavljanje sportskih aktivnosti i sportskih djelatnosti, rješavanje sporova, odgovornost, kao i na druga pitanja u vezi s radom sportskih društava osoba sa invaliditetom dosljedno se primjenjuju odredbe ovog zakona koje se odnose na sportska udruženja, ako ovim zakonom nije drugačije određeno.

Član 33 e.

Sportski savez osoba sa invaliditetom organizuje se na nivou Zeničko-dobojskog kantona.

Za jedan sport na nivou Zeničko-dobojskog kantona može se osnovati samo jedan sportski savez osoba sa invaliditetom.

Sportski savez osoba sa invaliditetom Zeničko-dobojskog kantona osniva se u skladu sa ovim zakonom i Zakonom o udruženjima i fondacijama Federacije Bosne i Hercegovine, na osnovu odluke sportskih saveza za osobe sa invaliditetom o dobrovoljnom udruživanju.

Sjedište sportskih saveza pojedinog sporta za osobe sa invaliditetom Zeničko-dobojskog kantona određuje se na osnovu razvijenosti sporta, tradicije, masovnosti i kvaliteta određene sportske grane.

Član 33 f.

Sportski savezi osoba sa invaliditetom Zeničko-dobojskog kantona nadležni su za:

- organizovanje i provođenje sistema takmičenja,
- zastupanje i predstavljanje sporta za osobe sa invaliditetom u federalnim, državnim, regionalnim i međunarodnim sportskim organizacijama,
- pripremanje i nastupanje klubova i državnih reprezentacija na zvaničnim međunarodnim takmičenjima,
- utvrđivanje programa razvoja u skladu sa Strategijom Kantona u sportu,
- saradnju sa nadležnim sportskim i drugim organima Kantona, Federacije BiH i Bosne i Hercegovine."

Član 19.

Član 34., briše se.

Član 20.

U članu 36., iza stava 2., dodaju se stavovi 3. i 4. koji glase:

"Pored pratećih sadržaja i odgovarajuće opreme, sportski objekat treba da bude pristupačan osobama sa invaliditetom.

Sportski objekti moraju ispunjavati propise međunarodnih sportskih organizacija, kao i standarde propisane odgovarajućim zakonima i drugim propisima."

Član 21.

Iza člana 37., dodaje se novi član "37 a." koji glasi:

"Član 37 a.

Kategorizacija sportskih objekata se utvrđuje u skladu s članom 56. Zakona o sportu u BiH.

Član 22.

U članu 44., iza stava 1. dodaje se novi stav 2. koji glasi:

"Organizacija sportskih takmičenja i priredbi mora biti usklađena s Zakonom o bezbjednosti održavanja sportskih takmičenja u Zeničko-dobojskom kantonu ("Službene novine Zeničko-dobojskog kantona", broj: 2/06) i odgovarajućim propisima u Kantonu, Bosni i Hercegovini kao i preporukama Evropske konvencije o suzbijanju nasilja i nedoličnog ponašanja gledalaca na sportskim priredbama, posebno na nogometnim utakmicama."

Član 23.

Članovi 45., 46. i 47., brišu se.

Član 24.

Član 48. mijenja se i glasi:

"Član 48.

"Za podnošenje kandidature za organizovanje velikih međunarodnih sportskih takmičenja i priredbi, koje su navedene u članu 53. Zakona o sportu u Bosni i Hercegovini, na području Zeničko-dobojskog kantona, podnosioci kandidature moraju:

- utvrditi inicijativno tijelo za cjelokupnu pripremu kandidature,
- obezbjediti uslove koji su predviđeni pravilima međunarodnih sportskih asocijacija,
- dobiti saglasnost odgovarajućeg sportskog saveza na državnom nivou, Sportskog saveza Bosne i Hercegovine ili Olimpijskog komiteta Bosne i Hercegovine,

- izraditi i predložiti Ministarstvu elaborat o organizovanju i finansiranju sportske priredbe,
- dobiti prethodnu saglasnost Vlade Kantona za podnošenje kandidature kod odgovarajućeg međunarodnog sportskog saveza,
- dobiti prethodnu saglasnost Ministarstva civilnih poslova Bosne i Hercegovine i Ministarstva kulture i sporta Federacije Bosne i Hercegovine.”

Član 25.

U članu 50. iza riječi: ”Javni interes” dodaju se riječi: “Kantona i općina.”

Član 26.

Iza člana 50. dodaju se novi članovi “50 a.” i “50 b.” koji glase:

"Član 50 a.

Da bi se ostvario javni interes i ciljevi u sportu Zeničko-dobojskog kantona, a u skladu sa Strategijom Bosne i Hercegovine, Zakonom o sportu u Bosni i Hercegovini, i podzakonskim propisima, donijeće se Strategija razvoja sporta Zeničko-dobojskog kantona (u daljem tekstu: Strategija).

Strategiju donosi Skupština Zeničko-dobojskog kantona za najmanje četiri godine (olimpijski ciklus).

Nacrt Strategije priprema Stručna komisija koju imenuje Vlada Kantona na prijedlog Ministarstva.

Na osnovu Strategije Zeničko-dobojskog kantona donose se Programi razvoja sporta na području Zeničko-dobojskog kantona.

Član 50 b.

Strategijom se utvrđuju:

- osnovna polazišta i pravci razvoja,
- sadržaj i obim sportskih djelatnosti koji se finansiraju iz Budžeta Zeničko-dobojskog kantona,
- razvojni i stručni zadaci u sportu,
- okvirni kriterijumi za vrednovanje programa i njihovog finansiranja u sportu,
- nosioci razvoja i mjere kontrole njihove realizacije."

Član 27.

U članu 64. brišu se: tačka 2., tačka 9., tačka 10., tačka 11.

U istom članu, stav 2., briše se.

Član 28.

Iza člana 66., dodaje se novi član “66a.” koji klasi:

“Član 66a.

Ministarstvo će donijeti propis iz člana 14 a. ovog zakona u roku od šest mjeseci od dana njegovog stupanja na snagu.

Vlada Kantona imenovaće u roku od 60 dana od dana stupanja na snagu ovog zakona, Stručnu komisiju za pripremu Strategije razvoja sporta Zeničko-dobojskog kantona.

Stručna komisija iz stava 2. ovog člana pripremiće Nacrt Strategije u roku od godinu dana od dana njenog imenovanja.”

Član 29.

Sve imenice upotrijebljene u ovom zakonu samo u muškom ili samo u ženskom rodu, odnose se na oba spola.

Član 30.

Na sva ostala pitanja koja nisu uređena ovim zakonom primjenjuje se Zakon o sportu u Bosni i Hercegovini.

Član 31.

Ovlašćuje se Zakonodavno-pravna komisija Skupštine Zeničko-dobojskog kantona da utvrdi prečišćeni tekst Zakona o sportu.

Član 32.

Zakon stupa na snagu osmog dana od dana objavljivanja u “Službenim novinama Zeničko-dobojskog kantona”.

Broj:
Datum:
Zenica

Predsjedavajući:

Sejad Zaimović s.r.

Obrazloženje

I-PRAVNI OSNOV:

Pravni osnov za donošenje ovog zakona sadržan je u odredbama Člana 37., stav 1., tačka f) Ustava Zeničko-dobojskog kantona, kao i člana 75. Zakona o sportu u Bosni i Hercegovini ("Službeni glasnik Bosne i Hercegovine", br: 27/08 i 102/09).

Izvod iz člana 37. stav h) Ustava Zeničko-dobojskog kantona glasi:

Skupština Kantona:

h) donosi zakone i ostale propise za izvršavanje kantonalnih nadležnosti.

Član 75. Zakona o sportu u Bosni i Hercegovini glasi:

"Član 75. (obaveza donosenja usklađenih zakona)

Nadležni organi entiteta i drugih nivoa administrativnog organizovanja u Bosni i Hercegovini dužni su da u roku od godinu dana od stupanja na snagu ovog Zakona donesu, odnosno usklade sa ovim zakonom svoje zakone i propise koji se odnose na oblast sporta.

II -RAZLOZI ZA DONOSENJE

Ovim izmjenama i dopunama vrši se usaglašavanje Zakona o sportu ("Službene novine Zeničko-dobojskog kantona", broj: 11/02 i 01/04) - (u daljem tekstu Kantonalni zakon o sportu), sa Zakonom o sportu u Bosni i Hercegovini i sa Zakonom o izmjenama i dopunama Zakona o sportu u Bosni i Hercegovini koji je Parlament Bosne i Hercegovine usvojio krajem 2009. godine. Sadržina pojedinih odredbi i razlozi usaglašavanja bliže su dati u poglavlju: "III OBRAZLOŽENJE".

III -OBRAZLOŽENJE POJEDINIH ODREDBI ZAKONA

U članu 1. Zakona o izmjenama i dopunama Zakona o sportu član 1. Kantonalnog zakona o sportu mijenja na način što se novim članom propisuju temeljna pitanja koja se uređuju zakonom i to: utvrđivanja javnog interesa, ciljevi i nadležnosti kantona i općina, osnovni principi u organizovanju sporta, prava i obaveze sportista, domaća i međunarodna sportska takmičenja, sportske priredbe, izgradnja, održavanje i korištenje sportskih objekta, organiziranje i rad ustanova u području sporta, sportske aktivnosti osoba s invaliditetom, zdravstvena zaštita sportista, sprečavanje i suzbijanje svih oblika nasilja i nedoličnog ponašanja gledalaca i korištenja nedozvoljenih stimulativnih sredstava u sportu, stručni rad, naučnoistraživački rad i informatika u sportu, finansiranje sportskih aktivnosti, nadzor i kaznene odredbe.

U članu 2. Zakona o izmjenama i dopunama Zakona o sportu vrši se usaglašavanje odredbi Kantonalnog zakona o sportu sa odredbama člana 4. i člana 6. Zakona o sportu u Bosni i Hercegovini, na način da se iza člana 2., dodaju novi članovi “2 a.” i “2 b.” kojima se ističe pravo provođenja sportske aktivnosti na bazi interesa i dobrovoljnosti u skladu sa odredbama ovog zakona i međunarodnim konvencijama, te osnovni principi na kojima se organizira sport na području Zeničko-dobojskog kantona.

U članu 3. Zakona o izmjenama i dopunama Zakona o sportu vrši se usaglašavanje člana 3. Kantonalnog zakona sa odredbom člana 3. Zakona o sportu u Bosni i Hercegovini na način da se uvodi novi stav 1. koji glasi :

„Sport je djelatnost od javnog interesa u Kantonu i općinama.“

Dosadašnji stav 1. postaje stav 2.

U članu 4., Zakona o izmjenama i dopunama Zakona o sportu član 5. Kantonalnog zakona mijenja se na način da vrši se usaglašavanje odredbi Kantonalnog zakona o sportu sa odredbama člana 45. Zakona o sportu u Bosni i Hercegovini kojim se definiiraju stručni poslovi u sportu .

U članu 5. Zakona o izmjenama i dopunama Zakona o sportu član 6. Kantonalnog zakona mijenja se na način da se vrši usaglašavanje odredbi Kantonalnog zakona o sportu sa odredbama člana 44. Zakona o sportu u Bosni i Hercegovini kojim se određuje, ko i pod kojim uvjetima može obavljati stručne poslove u sportu.

U članu 6. Zakona o izmjenama i dopunama Zakona o sportu vrši se usaglašavanje odredbi Kantonalnog zakona o sportu sa odredbama člana 18. i člana 20. Zakona o sportu u Bosni i Hercegovini, na način da se iza člana 9. dodaju novi članovi. “9a.” i “9 b.” kojima se uređuje osnivanje amaterskog i profesionalnog sportskog kluba.

U članu 7. Zakona o izmjenama i dopunama Zakona o sportu brišu se članovi 11.,12.i 13. Kantonalnog zakona o sportu jer se u članovima “9 a.” i “9 b.” ovog zakona navode propisi na državnom i federalnom nivou kojima se ova pitanja detaljno regulišu.

U članu 8. Zakona o izmjenama i dopunama Zakona o sportu vrši se usaglašavanje odredbi Kantonalnog zakona o sportu sa odredbama člana 15. i 64. Zakona o sportu u Bosni i Hercegovini, na način da se iza člana 14. dodaju novi članovi “14 a.” i “14 b.” kojima se propisuje da se fizička i pravna lica u sportu upisuju u poseban Registar fizičkih i pravnih lica u oblasti sporta koji vodi Kantonalni sportski savez, a Pravilnik o vođenju Registra donosi Ministarstvo (član “14 a.”).

Članom “14b.” propisuje se organizovanje jedinstvenog informacionog sistema u sportu s ciljem sistematskog praćenja i evidentiranja stanja u sportu, stručne, naučne i izdavačke djelatnosti.

U članu 9. Zakona o izmjenama i dopunama Zakona o sportu vrši se izmjena u članu 15. stav 1. na način da se riječ “ili” zamjenjuje sa riječju “i” tako da stav 1. glasi:

“Kanton i općina mogu osnovati javnu ustanovu ili privredno društvo s ciljem obavljanja stručnih, organizacijskih, tehničkih i drugih poslova u sportu.”

U članu 10. Zakona o izmjenama i dopunama Zakona o sportu član 16. Kantonalnog zakona se briše jer su takva pitanja regulisana zakonima o osnovnoj i srednjoj školi.

U članu 11. Zakona o izmjenama i dopunama Zakona o sportu član 17. Kantonalnog zakona o sportu mijenja se na način da se vrši preciziranje odredbi Kantonalnog zakona i potvrđuje dosadašnja uspješna praksa gdje su udruženja pedagoga fizičke kulture nosioci organizacije vannastavnih sportskih aktivnosti učenika uz prethodnu saglasnost na programske sadržaje koju daje Ministarstvo na osnovu mišljenja Pedagoškog zavoda.

U članu 12. Zakona o izmjenama i dopunama Zakona o sportu vrši se usaglašavanje odredbi Kantonalnog zakona o sportu sa odredbama člana 39. i 40. Zakona o sportu u Bosni i Hercegovini, na način da se iza člana 20. dodaju članovi “20 a.” i “20 b.” kojima se regulišu obaveze (član “20 a.”) i prava sportista (član “20b.”)

U članu 13. Zakona o izmjenama i dopunama Zakona o sportu član 22. Kantonalnog zakona mijenja se na način da se vrši usaglašavanje odredbi Kantonalnog zakona o sportu sa odredbama člana 41. Zakona o sportu u Bosni i Hercegovini kojim se određuje način sticanja statusa vrhunskog sportiste Bosne i Hercegovine.

U članu 14. Zakona o izmjenama i dopunama Zakona o sportu briše se član 23. Kantonalnog zakona jer se prava vrhunskih sportista regulišu u skladu s članom 41. Zakona o sportu u Bosni i Hercegovini.

U članu 15. Zakona o izmjenama i dopunama Zakona o sportu vrši se usaglašavanje odredbi Kantonalnog zakona o sportu sa odredbama člana 42. Zakona o sportu u Bosni i Hercegovini, na način da se iza člana 24. dodaje član “24 a.” kojim se određuje da u sportskim takmičenjima na području Zeničko-dobojskog kantona mogu učestvovati i strani državljani čija se prava i obaveze regulišu ugovorom sa sportskim organizacijama u skladu sa međunarodnim sportskim pravilima. Također se propisuje da sportisti i sportski stručnjaci strani državljani moraju imati dozvolu za rad od nadležnog državnog organa i registrovati se u skladu sa članom 42. Zakona o sportu u Bosni i Hercegovini.

U članu 16. Zakona o izmjenama i dopunama Zakona o sportu, u članu 28. Kantonalnog zakona o sportu ispred stava 1. dodaje se novi stav koji glasi: "Sportistima i svim učesnicima u sportu zabranjeno je da uzimaju nedozvoljena stimulativna sredstva, da ih daju kao i da podstiču njihovo korištenje u skladu sa pravilima Svjetske antidoping agencije (WADA)." Dosadašnji stav 1. postaje stav 2.

Na ovaj način vrši se usaglašavanje odredbi člana 28. Kantonalnog zakona o sportu s odredbom člana 49. Zakona o sportu u Bosni i Hercegovini.

U članu 17. Zakona o izmjenama i dopunama Zakona o sportu, u članu 29. iza stava 2. dodaju se stavovi 3., 4. i 5. kojima se preciziraju uslovi za osnivanje sportskih saveza (stav 3.) i vrši se usaglašavanje odredbi člana 29. Kantonalnog zakona o sportu s odredbama člana 22. stav (2) Zakona o sportu u Bosni i Hercegovini kojim se propisuje udruživanje sportskih saveza Kantona u sportske saveze Federacije Bosne i Hercegovine, odnosno u sportske saveze određenog sporta na nivou Bosne i Hercegovine. Također propisuje se da za jedan sport na nivou Zeničko-dobojskog kantona može se osnovati samo jedan sportski savez.

U članu 18. Zakona o izmjenama i dopunama Zakona o sportu iza člana 33. Kantonalnog zakona, a radi usklađivanja sa odredbama čl. 3. i 4. Zakona o izmjenama i dopunama Zakona o sportu u Bosni i Hercegovini ("Službeni glasnik Bosne i Hercegovine", broj 102/09), dodaju se novi članovi "33 a.", "33b.", "33c.", "33d.", "33 e".i"33 f." kojima se uređuje osnivanje sportskih klubova osoba sa invaliditetom, definišu amaterski i profesionalni sportski klub osoba sa invaliditetom, udruživanje sportskih klubova osoba sa invaliditetom u sportska društva, sportske saveze i utvrđuju nadležnosti Sportskog saveza osoba sa invaliditetom Zeničko-dobojskog kantona.

U članu 19. Zakona o izmjenama i dopunama Zakona o sportu briše se član 34. Kantonalnog zakona jer su ta pitanja regulisana članom 33 a. ovog zakona.

U članu 20. Zakona o izmjenama i dopunama Zakona o sportu u članu 36. iza stava 2. Kantonalnog zakona o sportu, dodaju se stav 3. i 4. koji glase:

"Pored pratećih sadržaja i odgovarajuće opreme, sportski objekat treba da bude pristupačan osobama sa invaliditetom.

Sportski objekti moraju ispunjavati propise međunarodnih sportskih organizacija, kao i standarde propisane odgovarajućim zakonima i drugim propisima".

Na ovaj način vrši se usaglašavanje odredbi člana 36. Kantonalnog zakona o sportu s odredbama člana 55. stav (2) i (3) Zakona o sportu u Bosni i Hercegovini.

U članu 21. Zakona o izmjenama i dopunama Zakona o sportu iza člana 37. Kantonalnog zakona o sportu dodaje se novi član "37 a." čime se vrši usklađivanje odredbi kantonalnog zakona o sportu s odredbama člana 56. Zakona o sportu u Bosni i Hercegovini kojim se određuje da se kategorizacija sportskih objekata utvrđuje u skladu s posebnim Pravilnikom o kategorizaciji sportskih objekata kojeg donosi Ministarstvo civilnih poslova BiH

U članu 22. Zakona o izmjenama i dopunama Zakona o sportu u članu 44. Kantonalnog zakona o sportu iza stava 1. dodaje se stav 2. koji glasi:

“Organizacija sportskih takmičenja i priredbi mora biti usklađena s Zakonom o bezbjednosti održavanja sportskih takmičenja u Zeničko-dobojskom kantonu (“Službene novine Zeničko-dobojskog kantona” broj: 2/06) i odgovarajućim propisima u Kantonu, Bosni i Hercegovini kao i preporukama Evropske konvencije o suzbijanju nasilja i nedoličnog ponašanja gledalaca na sportskim priredbama, posebno na nogometnim utakmicama.”

Na ovaj način vrši se preciziranje odredbi člana 44. kantonalnog zakona kao i usaglašavanje s odredbama člana 52. Zakona o sportu u Bosni i Hercegovini.

U članu 23. Zakona o izmjenama i dopunama Zakona o sportu brišu se članovi 45., 46. i 47. Kantonalnog zakona jer se Zakonom o bezbjednosti održavanja sportskih takmičenja u Zeničko-dobojskom kantonu (“Službene novine Zeničko-dobojskog kantona” broj: 2/06) i Pravilnikom o posebnim uslovima koje trebaju ispunjavati sportski objekti s obzirom na bezbjednost održavanja sportskih takmičenja (“Službene novine Zeničko-dobojskog kantona” broj: 11/06) ova pitanja detaljno regulišu.

U članu 24. Zakona o izmjenama i dopunama Zakona o sportu, član 48. Kantonalnog zakona o sportu mijenja se na način da se vrši usaglašavanje odredbi Kantonalnog zakona o sportu sa odredbama člana 54. Zakona o sportu u Bosni i Hercegovini kojim se određuju uslovi za podnošenje kandidature za organizovanje velikih međunarodnih sportskih takmičenja i priredbi (koje su navedene u članu 53. Zakona o sportu u Bosni i Hercegovini) na području Zeničko-dobojskog kantona i to tako da se utvrđuje redosljed prethodnih radnji i pribavljanje neophodnih dokumenata i saglasnosti prije podnošenja kandidature.

U članu 25. Zakona o izmjenama i dopunama Zakona o sportu vrši se dopuna i preciziranje odredbi člana 50. kantonalnog zakona na taj način da se iza riječi: “Javni interes”, dodaju riječi: “Kantona i općina” tako da cijela rečenica glasi: “Javni interes Kantona i općina u sportu obuhvata slijedeće ciljeve:”

U članu 26. Zakona o izmjenama i dopunama Zakona o sportu, iza člana 50. Kantonalnog zakona dodaju se novi članovi “50 a.” i “50 b.” Na taj način vrši se usaglašavanje kantonalnog zakona sa odredbama članova, 9., 10. i 11. Zakona o sportu u Bosni i Hercegovini kojima se propisuje izrada Strategije razvoja sporta u cilju strateške realizacije javnog interesa, utvrđuje se način izrade Strategije i elementi koje Strategija treba da sadrži.

U članu 27. Zakona o izmjenama i dopunama Zakona o sportu vrši se konzistentno pravno tehničko usaglašavanje odredbi zakona, jer se brišu odredbe o kazni za prekršaj odredbi brisanih članova 12., 23., 45., 46., i 47., Kantonalno zakona o sportu.

U prijelaznim odredbama, **članom 28.**, Zakona o izmjenama i dopunama Zakona o sportu dodaje se novi član “66a”, a kojim se uređuje dinamika provođenja ovog

zakona na način da će nadležni ministar donijeti propis iz člana 14 a. ovog zakona u roku od šest mjeseci od dana njegovog stupanja na snagu, a da će Vlada Kantona imenovati u roku od 60 dana od dana stupanja na snagu ovog zakona, Stručnu komisiju za pripremu Strategije razvoja sporta Zeničko-dobojskog kantona. Stručna komisija iz stava 2. ovog člana pripremiće Nacrt Strategije u roku od godinu dana od dana njenog imenovanja.

U završnim odredbama, **članom 29.**, Zakona o izmjenama i dopunama Zakona o sportu utvrđuje se da: sve imenice upotrijebljene u ovom zakonu samo u muškom ili samo u ženskom rodu, odnose se na oba spola, a odredbama člana 30. uređeno je da se na sva ostala pitanja koja nisu uređena ovim Zakonom primjenjuje Zakon o sportu u Bosni i Hercegovini.

Odredbama **člana 31.** ovlašćuje se Zakonodavno-pravna komisija Skupštine Zeničko-dobojskog kantona da utvrdi prečišćeni tekst Zakona o sportu.

U **članu 32.** utvrđen je rok stupanja na snagu Zakona o izmjenama i dopunama Zakona o sportu.

IV -SREDSTVA ZA PROVOĐENJE ZAKONA

Za provođenje Zakona o izmjenama i dopunama Zakona o sportu saglasno odredbama Zakona o pripadnosti javnih prihoda u Federaciji Bosne i Hercegovine i finansiranju Federacije Bosne i Hercegovine ("Službene novine FBiH", broj: 26/96, 32/98, 54/01 i 37/03), planirana su finansijska sredstva u Budžetu Zeničko-dobojskog kantona za 2010. godinu, za ostvarivanje interesa Zeničko-dobojskog kantona u oblasti sporta.